



Aqqalu C. Jerimiassen

UPA 2022/75-1

Atassut

10. Maj 2022

Inatsisartut aalajangiiffisassaattut siunnersuut, Naalakkersuisut peqquneqassasut suleqatigiissitamik pilersitsissasut Kalaallit Nunaanni filmiortartut silarsuaata qanoq nukittorsarsinnaaneranut innersuussuteqartussanik. Naalakkersuisut sapinngisaq tamaat suleqatigiissitami attuumassuteqartut peqataatissavaat. Siunnersuutit UPA 2023-mi saqqummiunneqassapput.

(Inatsisartunut ilaasortaq Nivi Olsen, Demokraatit)

Nunat sanilitta filmiliorneq aningaasaqarnermikkut isaatitsissutigersuortorsuaat, ilami allaat takusaraagut “nunatsinniillutik” filminiittut, ajoraluartumilli piviusumik nunatta avataani sanilitsinni arlaanni immiunneqarsimasunik.

Inuussutissarsiornikkut aningaasarsiornikkullu maannakkut nutaanik pilersitsisariaqarnitta pingaaruteqarnera naluneqanngilaq, aningaasarsiorfissatummi ukiut siuliini takorluungaasimangaluit aatsitassarsiornikkut uuliasiornikkullu, piviusunngorsinnaanissaat ilimanaataarutereemat nutaavinnik ujartuisariaqarpugut.

Nunanullu sanilitsinnut qiviaqqilaariarutta, Canada nuna kimmut sanilerput “Hollywood North”-imik taaniarneqartartoq 2020-imi ukiumut BNP-mikkut \$12.2 mia. kaaviartissimavaat, tassa qallunaat aningaasanngorlugit kr.86.2 mia. sinnilaarlugit annertussuseqartut. Toqqaannartumik toqqaannangitsumillu suliffissanik 244.500-inik pilersitsiviusimasunik.

Taava nunarput qivialaariaraanni, qanoq uagut maanna inissisimavugut? Sunngiffimmi kultoorikkullu suliatut taamaallaat annerusumik aallunneqarpoq, avataaniillu filmilioriartornianut ussasaarinerput amingarujussuartutut taaneqarsinnaavoq. Nunarsuarmioqatitta aningaasarsiorfipiluunersuat sooq uagut saniatigut sammisassaannartut isigissanerparput, tassuuna nutarterisariaqalersimanerput erseqqarippoq.

Nunatta avataanit filmiliorifigineqarnissamut ussasaarinissamut tikikkuminassuseq tassani annertuumik peqqutaaqataassasoq qularnanngilaq, maannalu mittarfissuit naammassiartuaalerfianni avammut nunatta ussasaarutigineqarnerusariaqalerneru pisariaqavissulerpoq. Nunarput filmiliorfissaqqissutut avammut nittarsaatissallugu ussasaarisartunik sumiiffissarsiuussisartunillu pilersitsisariaqarpugut, tassa taakkua filmiliornerup iluani location scouts-inik taaneqartartut, taakkulu nunarsuatsinni filmiassanut angisuunut aningaasartaqarluartunut nunatta iluani filmiliorfissaqqissut angallannikkullu aqqutissat periarfissallu nittarsassuaat.

Assersuutissaqqissunik tiguseqqilaariaraanni, 2010-imi Ilulissani Sermermiuni The Last Airbender filmiliarineqarneranut atatillugu, isiginnaagassiami 1t 43min-imillu sivisussuseqartumi 10min ataallugu atungassaminnik suliaqarput, taannalu Ilulissani aningaasarparujussuarnik, taamatuttaarlu Air Greenlandimut aningaasarparujussuarnik isertitsivigineqarpoq.

Maanna filmiortarnermi millionerparujussuarnik aningaasalerneqartumik ingerlanneqartarput, siulianilu assersuuteqarninni, ataasiaannartumik takoreernerani isaatitsivissaalluartoq filmiliornerup silarsuaa takuneqarsinnaareerpoq. Assersuutigalugulu nunatsinni filmiortartut avataaniit suleqateqartillualerneratigut, taamatuttaarlu ussassaaralutik sumiiffissarsiuussisartunik inerisaalluarnikkut ukiumut qulit angullugit filmiliorianik, filminik angisuunik suliaqarnianiik tikinneqartalertuugutta kr.200-300mil angullugit kaaviaartitaqarnerusoqarsinnaaleratarsinnaanera angusinnaavarput.

Uani maanna nunatsinni filmiortartut inerisarnerussagutsigit, Qallunaat nunaata filmiliornikkut ineriartortitsinermut ingerlataa Det Danske Filmindstitut siullertut suleqatiginiarneqarsinnaavoq, periusiallu malikannerlugu nunatsinnut naleqqussarneratigut filmiortartortatta siunissami angusaqarlualernissaat, nunarsuarmioqatitalu sinneranut nalimmatsikkiartulerneqarnissaat piviusorsiuulersinnaavoq.

Siunissaq ungasinnerusoq isigalugu filmiliorneq aningaasarsiorfiullualersussatut isiginiartariaqarparput, angallannikkullu pissutsit mittarfissuit naammassereernerini eqaannerulersarneratigut nunatta avataaniit nunatsinni filmiliorniat matumik ammaannerisigut, inatsisitigullu aporfissakillisaaviginerisigut, aningaasarsiorinissamut aqqut nutaaq nassaariartulersinnaavarput. Utaqqiinnaralaruttami takkuttoqarnaviangilaq, nammineq iliuuseqarnitsigut nunarput avammut filmiliorfissaqqissutut nittarsaassinnaalluarparput.

Taamatut oqaaseqarluta Atassummiit siunnersuut Kultooreqarnermut, ilinniartitaanermut, ilisimatusarnermut Ilageeqarnermullu ataatsimiitsitaliamut innersuupparput.